



Broj: 05/2-50-1-76-21/11

Sarajevo, 13.04.2011. godine

**KOLEGIJ OBA DOMA
PARLAMENTARNE SKUPŠTINE
BOSNE I HERCEGOVINE**

**PREDMET: IZVJEŠTAJ O POSJETI MEĐUNARODNIM GRANIČNIM
PRIJELAZIMA U BRČKOM I BIJELJINI (07. – 08.04.2011. godine)**

U skladu sa Zaključkom Odbora za žalbe građana Parlamentarne skupštine Bosne i Hercegovine (u daljem tekstu: Odbor za žalbe građana) usvojenim na 14. sjednici, članovi Odbora za žalbe su na svojoj 21. sjednici održanoj 30.03.2011. godine, odlučili posjetiti Terenske urede Granične policije Bosne i Hercegovine u Brčkom i Bijeljini. Osnovni razlog posjete međunarodnim graničnim prijelazima i terenskim uredima Granične policije BiH je upoznavanje pripadnika navedene policijske agencije sa nadležnostima i radom Odbora za žalbe građana, ali i vršenje uvida u stanje “na terenu”, te upoznavanje sa uslovima rada, eventualnim problemima i poteškoćama sa kojima se susreću uposlenici Granične policije BiH.

U skladu s navedenim, u četvrtak, 07.04.2011. godine, Odbor za žalbe građana posjetio je Terenski ured Granične policije BiH u Brčkom. Sastanku su, pored članova Odbora za žalbe građana i predstavnika Granične policije BiH, prisustvovali i predstavnici Policijske misije Evropske unije i predstavnik USAID PSP-a. Prilikom posjete, članovi Odbora za žalbe građana predstavili su rad Odbora za žalbe građana, u smislu njihovih nadležnosti, te prava i dužnosti utvrđenih Zakonom o nezavisnim i nadzornim tijelima policijske strukture u BiH i Poslovníkom o radu Odbora za žalbe građana na rad policijskih službenika BiH. Također, članovi Odbora za žalbe građana skrenuli su pažnju na najčešće probleme sa kojima se susreću prilikom razmatranja predstavki građana, a koje se prvenstveno odnose na formalne nedostatke koji se javljaju u početnim obrascima Granične policije BiH o predstavkama građana. Prije svega, skrenuta je pažnja na sam izgled Obrasca na kojem se podnosi početni izvještaj o predstavci u smislu da je suviše kompliciran. Također, naglašena je potreba pravilnog ispunjavanja Obrasca u cijelosti, čime bi se ispunili bar formalni uslovi za razmatranje predstavke, te iznimno važna uloga koju u cijelom

postupku podnošenja žalbe na rad policijskih službenika imaju komandiri, odnosno vođe smjene. Članovi Odbora za žalbe građana upoznali su predstavnike Granične policije BiH sa iskustvima i znanjima koja su stekli u Studijskoj posjeti institucijama Velike Britanije, te predložili da se upriliči uzvratna posjeta eksperata iz Velike Britanije s ciljem razmjene iskustava sa predstavnicima Granične policije BiH, ali i drugih policijskih agencija Bosne i Hercegovine. Posjeta je iskorištena i da se izvrši predaja promotivnog materijala Odbora za žalbe građana (letaka i plakata), izrađenog uz finansijsku pomoć USAID PSP-a. Dogovoreno je da se sav promotivni materijal istakne na vidnim mjestima i učini dostupnim građanima, s ciljem njihovog upoznavanja sa radom Odbora za žalbe građana.

Predstavnici Granične policije BiH, Terenskog ureda Brčko, upoznali su članove Odbora za žalbe građana sa nadležnostima svoje Jedinice, u smislu da policijski službenici Granične policije BiH nadgledaju područje od 32 riječna kilometra, te tri međunarodna granična prijelaza za različite vrste saobraćaja – riječni, drumski i željeznički. Imajući u vidu da na svim graničnim prijelazima u njihovoj nadležnosti godišnje pređe oko milion i po građana, veliki uspjeh je da predstavki nije bilo u velikom broju te da su sve ocijenjene kao neosnovane. Članovi Odbora su se i sami uvjerali u rad i profesionalnost službenika Granične policije BiH, poznavanje zakonskih i podzakonskih akata na MGP Brčko za kopneni i riječni saobraćaj, te uslove u kojima policijski službenici rade.

U petak, 08.04.2011. godine članovi Odbora za žalbe građana susreli su se i sa predstavnicima Granične policije BiH u Terenskom uredu u Bijeljini. I ovaj susret je iskorišten za prezentaciju rada, nadležnosti, te dužnosti Odbora za žalbe građana, Svakako, ponovno je skrenuta pažnja na najčešće probleme sa kojima se članovi Odbora susreću prilikom razmatranja predstavki građana, a koje se prvenstveno odnose na formalne nedostatke koji se javljaju u početnim obrascima o predstavkama građana. Svakako, razmijenjena su iskustva koja su članovi Odbora za žalbe građana stekli prilikom Studijske posjete institucijama Velike Britanije. Također, izvršena je i predaja promotivnog materijala Odbora za žalbe građana (letaka i plakata), uz molbu da se izloži na vidnim mjestima i učini dostupnim građanima.

Predstavnici Granične policije BiH, Terenskog ureda Bijeljina, upoznali su članove Odbora za žalbe građana sa nadležnostima svog Ureda, u smislu da policijski službenici Granične policije BiH – TU Bijeljina, vrše kontrolu nad 15 graničnih prijelaza i to kako međunarodnih, tako i pograničnih, te kako su neki od njih namijenjeni za drumski saobraćaj, neki za željeznički, a neki za riječni saobraćaj, dok je ukupan broj ljudi koji godišnje koriste

navedene granične prijelaze - oko 15 miliona. Prilikom diskusije, kao osnovni nedostaci definirani su loši uslovi rada, te, do određene mjere neizgrađena infrastruktura, velika frekvencija vozila, ali i (ne)odgovarajuće funkcioniranje video-nadzora na pojedinim graničnim prijelazima, što u velikom broju slučajeva predstavlja smetnju u samom procesu ispitivanja osnovanosti predstavki građana. Članovi Odbora za žalbe građana imali su priliku i sami se uvjeriti u stanje “na terenu”, prilikom posjete MGP Pavlovića most.

Konačno, Odbor za žalbe građana je zaključio da je posjeta u potpunosti ispunila očekivanja, te da je dosadašnju praksu neophodno nastaviti. U cilju rješavanja uočenih nedostataka, članovi Odbora za žalbe građana ponovili su potrebu učestalijeg održavanja sastanaka sa čelnicima Granične policije BiH, ali i predstavnicima drugih institucija, poput Uprave za indirektno oporezivanje i Policijske misije Evropske unije.

Predsjednik
Odbora za žalbe građana
Mate Miletić